



UKA 2017/53
17. okt. 2017
Bendt B. Kristiansen

Ingerlatseqatigiiffiit tamakkiisumik killilimmillu akileraartussaataasut il.il. akileraarutaassa ulloq 1. januaari 2019 aallarnerfigalugu 20 procentimut appartinneqarnissaanut isertitanut akileraarut pillugu Inatsisip allannguutissaanik saqqummiusseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Randi V. Evaldsen)

Ukiut aggerput pisortani ingerlatsinermi annerusumik aningaasartuuteqarfigilerumaakkagut, tamanna ukiuni kingullerni uteqqiattumik eqqartorparput.

Ukiut makku ukiullu aggersut atussuagut aqqissuusseqqinnerit nunatta karsianut isertitaqaataanerulerumaartussat suliaralutigit. Nukigut atussanngilagut nunatta karsianut isertitsissutigisartakkatta qularnaattut nungusarnissaannut, nukigut atussanngilagut inuiaqatigiit ilaasa ikorfartorneqartariaqartut akiliinerusariaqalernissaannik kinguneqartussanut.

Nuna atugarissaarnermik tunngaveqartumik ilusilersuisoq qulakkeerinnittussaavoq akissaatikinnerusut akunnattumillu isertitaqqortussuseqartuusut pilliutigineqannginnissaannik. Nunanut allanut atugarissaarnermik tunngaveqartumik aqqissuusaaasimasuni suliffeqarfiit akileraartarnerat assersuukkusunnarsinnaagaluarpoq, taamaattoq avatangiisitta allarluinnarmik unammilligassaqartitsisuusup toqqaannartumik sanillersuusissinnaanerput naapertuilluartumik takussutississinnaanngilaatigut.

§37 apeqqut nr. 223 2016-meersoq naapertorlugu akileraarut ataaseq kr. 9 mio. naleqarpoq, akileraarullu 31,8%-mit 20%-mut apparneqassagaluarpat ukiumut kr. 108 mio. missaannik naleqassaaq. Allatut oqaatigalugu ukiuni tulliuuttuni qulini nunatta karsianut isertitassaagaluit kr. 1,1 mia. isertinngitsoorsimassavagut. Qularnarporlu suliffeqarfiit ima annertutigisumik inerisaasinnaalersimajumaartut allaat isertitakkat kr. 1,1 mia. sinnerlugit annertunerusumik isertitsisalersimassallutik.

Siunnersuuteqartumut apeqqutigisariaqalerpoq ukiut tulliuuttuni qulini isertitassat nutaat qanoq ililluni sukkullu aaniarneraat. Maluginiaqqullugu Demokraatit aqqissuusseqqinnerit maanna ukiaq saqqummiunneqartut nunatta karsianut nutaamik isertitaqaataalerumaartussat oqaluuserinerini oqallinnernilu itingartitsissutigineqarnissaannik inassutigineqaqattaarmata, aqqissuusseqqinnissamut siunnersuutit pineqartut imm. 88, imm. 89 aamma imm. 91 ataatsimut katillugit ukiumut kr. 45 mio. missaannik annertussuseqartut, ukiut qulinut kr. 450 mio.

Taamaalilluni Demokraatit siuttuusuuppata ukiuni tulliuuttuni qulini nunatta karsiata isertinngittoorumaagarissagaluarpai kr. 1,5 Mia. missaat, ukiuni isertitaqarnerulernissamik pisariaqartitsivitsinni. Taakku saniatigut ingerlatseqatigiiffiit nunatta karsianut akileraarutissaralui kinguartitat ullumikkut kr. 333 mio. annertussuseqarput.

Taamak tunngavilimmik nunarput aqunneqassappat eqqugaasussat tassaapput isertitakinnerusut, akunnattumillu isertitaqqortussusillit, assersuutitut pædagog-it, pisiniarfinni sulisut, SIK isumaqatigiissutaat naapertorlugit isertitaqartut, ilinniartitsisut, allaffinni aqutsisut (kontorchef), immikkoortortani aqutsisut (afd.chef), ilami inuiaqatigiit tamatta akiliinerulertussaajumaarpugut, suliffeqarfissuit angisuut ingerlalluartut minillugit.

Eqqaamassavarputtaaq missingersuutinik ingerlatsinermi inatsit malillugu ingerlatsinermi ukiut missingersuusiorfiusut sisamat siumut ilanngullugit aningaasanut inatsisissaq nalimmattumik suliarineqartussaataammaat, taamaattumik nunatta karsiata inatsisitigut nammassinnaangilaa ingerlatseqatigiiffiit akileraartarnerata ukiuni tulliuuttuni qulini kr. 1,5 mia.-nik nalilimmik appaavigineqarnissaat.

Siunnersuut taamatut iluseqartillugu itigartitsissutigineqassasoq inassutigaarput.